



CVM D. Petrus Ecclesiam Christi Romę uerbo Dei salutifero pasceret, non contentus fuit uno in loco gentilium superstitiones tollere, & uineam Domini plantare, uerum etiam ad alias partes pios & eruditos uiros suos discipulos emisit, qui homines instruerent. Præsertim autem id in prouincijs Italicis & Gallicis factum est, qui bonis literis instructi, reliquis Barbaris aptiores erant ad diuinum cultum capescendum. Itaque Maternum, Eucherium, & Valerium ad Rhenenses Germanos, qui Rhenum sub Ariouisto rege transgressi, Gallię partes inhabitare ceperant, misit, atque ijs Euangelium prædicare iussit. quod quidem illi

gnauiter perfecerunt. In primis autem Maternus omnem operam adhibuit, ut Christi uera doctrina passim spargeretur. Itaque primò in Alsatia, Anno Christi 55 Ecclesiam constituit, atque piorum opera uisus non procul Selestadio, in loco quod tum Nouientum, nunc uerò Ebersheim Munster dicitur, Idolorum celebre templum destruxit, quod ante centum & amplius annos Iulius Cæsar, qui Galliam Romanis subiecerat, fundarat, suis dijs ob uictoriam ademptam, sese gratum declarans. Postea uerò Argentinam, Treuerim, Moguntiam, & Coloniam profectus, ubique aliquos Christo lucratus est. Propterea eorum locorum annales, eundem primum suę regionis præsulem constituunt.